

ანოტაცია

სამაგისტრო ნაშრომის კვლევის ობიექტია გურჯისტანის ვილაიეთის დემოგრაფიული ვითარების ანალიზი 1595 წლის „გურჯისტანის ვილაიეთის დიდი დავთრის“ მიხედვით. კვლევისათვის გამოყენებულია ს. ჯიქიას მიერ თურქული ხელნაწერი ძეგლის ქართული თარგმანი [1941] და ალ. ასლანიკაშვილის „გურჯისტანის ვილაიეთის რუკა“, მასშტაბი 1:30, 000 [1953].

გის-ტექნოლოგიების გამოყენებით დადგინდა გურჯისტანის ვილაიეთის დასახლებული პუნქტებისა და მოსახლეობის ტერიტორიული განაწილების თავისებურებანი ადმინისტრაციული ერთეულების (ლივები, ნაჰიეები) მიხედვით. იმდროინდელი საგადასახადო სისტემის ანალიზით შესაძლებელი გახდა მუსულმანთა და არამუსულმანთა მოსახლეობის რაოდენობების განსაზღვრა ცალკეული ადმინისტრაციული ერთეულების მიხედვით. დადგენილ იქნა დასახლებულ და დაუსახლებელსოფელთარაოდენობა. გაანალიზდა იმდროინდელი ადმინისტრაციულ-ტერიტორიული მოწყობის სისტემა. ნაშრომში დეტალურადაა აღწერილი გურჯისტანში შემავალი ლივების და ნაჰიეების მდებარეობა, საზღვრები და ფართობები, რისთვისაც ზემოთ აღნიშნული რუკის გარდა, გამოყენებულია საბჭოთა ტოპოგრაფიული რუკა (მასშტაბი 1:25,000).

კვლევის შედეგების ვიზუალიზაციის მიზნით, ნაშრომში ჩართულია მრავალი თემატური რუკა, დიაგრამა და ცხრილი.